

【戽水捉魚】郭亭好原作

阿宏哥一溜斯係莊肚个搞頭王，不管係拈蛇打蜴、戽水捉魚抑係起窯燂番薯、打鳥仔、灌土狗仔，麼个戲齣佢都曉變，佢這兜細孖仔，做下當好跔佢滿山滿坪滿哪挨、滿哪奈。

有一年堵著做天旱，莊尾該條河壩水硬硬會燥忒咧，阿宏哥斯湊佢兜共下去河壩戽水捉魚仔，大家聽著又有好搞个，暢到奈毋得，遽遽轉去屋下擺傢伙，有兜人拿錫桶、面盆，有兜人拿瓠杓、撈筐¹，阿宏哥自家擎一支大砂撩²，歸陣細人仔斯擺等傢啦伙磬磬鏘鏘³行對河壩去。

一到河壩，阿宏哥斯用大砂撩耙出一條水路，撈水旱走開始攔水窟，水窟攔好咧，大家斯拿等面盆、瓠杓，撈窟肚个水戽往出；阿明毋知挑挑抑係毋堵好，一面盆个水戽啊出去，嘎戽著行對佢面前過个阿傑，害佢歸身潦潦連目珠都擘毋開，阿傑闊摔摔仔搭等拳頭嫵想愛過去搵⁴阿明，阿宏哥看著斯遽遽行兼撈阿傑拉開，講阿明毋係挑挑个毋好闊啦！再過喊阿明撈阿傑會失禮；阿

明當有誠意，頭那緊領緊會失禮，阿傑斯無恁闊咧，應講：「好啦！無要緊啦！這下天時恁熱，恁樣也較涼啦！」斯恁樣，大家又過嘻嘻哈哈歡喜戽水咧。

天頂个日頭當箭日，逐儕都汗流脈落，等水戽燥該下，看著緊奮緊跳个山鯪、石貼仔、白哥仔、石斑、蝦公這兜，大家做下暢到奈毋得！阿旺較細，還毋識戽水捉魚仔過，這擺分佢看著有恁多魚仔、蝦公好捉，暢到緊喊緊跳，毋堵好嘎去踩著有溜苔个石頭，跔到四腳惹天，連褲襠底都濕忒，原旦佢歡喜到噉噉滾，這下嘎噉到哇哇滾，大家看著也做下笑到吃吃滾⁵，喊佢愛較細義兜。

大家圍兼來七手八腳開始捉魚仔、擒蝦公。蝦公大體會囡在石牯下，佢兜斯緊搨石牯緊捉；係還有戽毋躁个細水窟，斯愛用撈筐去撈魚仔，毋過上游水又會緊在石頭縫溝落來，大家緊捉魚仔又還愛緊戽水，斯恁樣，大家搞到歡喜靈天無想愛轉。

會暗昏咧！阿宏哥喊大家撈東西收掣，又撈今晡日所有捉著个魚仔並蝦公分大家平分⁶，有好搞又有好拿，逐儕都當暢，緊講韶早還愛再過來。恁多年過去咧！到今佢還記得細人仔時个該條河壩，撈共下戽水捉魚仔个細人仔伴。

¹ 撈筐：音 leu fe`；捉魚蝦或昆蟲的長柄網具。

² 砂撩：音 sa` liau`；圓鋤。

³ 磬磬鏘鏘：音 kin kin kiang kiang/kin` kin` kiang` kiang`；狀聲詞，形容金屬相擊聲。

⁴ 搵：音 zem`；握緊拳頭揍人的樣子。

⁵ 吃吃滾：音 kid` kid` gun`；笑聲。

⁶ 平分：音 piang bun`；平均分配。

【寫分考卷个心頭話】曾菁怡原作

熟事你幾下年，毋識聽你講過一句話，明知佢个名姓，逐擺看著佢又過愛佢寫一擺分你看，實在毋知你个心思。

熟事你幾下年，你總係愛佢自家理解你个問題，係回答毋著，你就面紅濟炸摻佢變面，佢姆係知，佢就有竹筏仔好食。

熟事你幾下年，係看著你滿面笑容，佢就天轉笠嫲花，歡喜到奈毋得，鞋底像有鴨公虬¹樣，行路都會跳啊跳。

考卷啊考卷，佢个學生生活一溜里來摻你黏核核，剝都剝毋敢；你分佢又驚又怕，又有當多个期待。佢驚怕毋知仰般回答你个問題；佢又期待你个問題全部在昨暗晡更深夜靜該下佢讀過。

考卷啊考卷，佢姆係已愛摻你見面，逐擺約定見面个日仔係到咧，佢就企坐毋核，像人吸收毋著空氣，啞水還會哽著，胃裡肚像有一隻緊來緊大个雞胥仔，輕輕仔鼓²一下就會爆忒……。

恁得人惱个你係麼人發明个？先生試著你盡要緊，爺哀總係記得你哪久會跔佢轉屋下，想愛摻你困起來斯無法度。逐擺生日許願今年做得無考試，結果一擺都無實現；跔阿婆去拜伯公，摻伯公祈求先生个考卷會毋見忒，結果乜無一擺成功。

該日佢寫毋出答案，你又關到面紅濟炸，先生摻你交分佢該下講：「寫考卷係檢驗你學習个情況，毋使摻佢看做洪水猛獸，寫毋著个地方恁俚愛加強學習，恁樣正會進步。」佢正了解你背後个心思，點點滴滴就係愛幫助佢，原來佢誤解你恁久……。

所以佢開始改變學習个方法：先生還吉上課，佢斯先復習內容；先生講解課程該時，佢就耳角角仔聽，還摻重點記下來；下課時間，佢會請教先生問題，無斯尋同學討論；放學轉到屋下，佢就煞猛讀書，回想今晡日先生教過麼个。日見日，佢越來越體會著學習个快樂摻成就感，寫考卷乜緊來緊有信心。

考卷啊考卷，頭擺對你个怨怪係佢對你無了解，總係摻你當做大精怪，發夢都想摻你扯爛爛。自從理解你个用意後，佢斯摻你當做學習溫度計，溫度忒低代表佢學習毋罇，愛較認真兜；溫度提高，就表示佢有吸收先生教个內容，係對佢學習个肯定。

考卷啊考卷，感謝你督促佢認真讀書，佢會煞猛打拚分你有滿面个笑容，毋會失望。

¹ 鴨公虬：音 ab gung` kiu；彈簧，客語又稱「鋼弓仔，音 gong` giung` er」。

² 鼓：音 gu；以尖銳之物刺入。

【放學轉屋下个路項】邱一帆原作

放學轉屋下个路項，你還記得幾多个風景？你還記得幾多个人情？

還記得有一頭羅漢松，高高大大，企在校門脣，該係佢上課、放學時節定著會對脣頭經過、看著个大樹。春天到來，一群黃黃个蝶仔，會在樹仔頂高个花葉之間，飛上飛下，黏花採蜜；避暑，阿浩仔蹶上樹頂做起報音員，實況轉播大南埔對小南埔个野球比賽，輸个該隊，會在烈烈个日頭下，捩等操場走到汗流脈落。

離開羅漢松樹，跔等就愛離開校門，行轉轉屋下个路。

校門左手析係行去大南埔个方向，正手片係行轉小南埔个路，校門正對面係學校先生个宿舍。宿舍係日本時代就起个木造屋，兩排齊齊正正个屋，看起來當舒適，中央幾頭麻黃樹，摺宿舍遮到爽涼爽涼。小學生个佢，毋敢行兼去看，驚怕堵著先生無斯先生娘，賺來一頓罵——佢會放學還毋轉屋，在這看麼个！毋過，佢識影著戴在頭間个外省先生，專心寫等水筆字，靚靚个白紙烏字，飛到佢个眼前，到今還深刻在佢个心肝肚。這下，日本宿舍早就拆忒，水筆先生也過身轉天國咧，斯留下一隻紅毛泥打个停車場，長下空空無半臺車仔停到該，實在當孤栖！

幹轉正片析，係一長段下崎。正愛下崎个左手片，企等一排大紅花樹。紅啾啾个大紅花，係講愛靚个細阿妹仔路過，摘一蕊下來，插在耳空脣，就像係一隻靚靚个新娘。捲捲个大紅花葉裡背，長下園等青蟲仔，童年个佢蠻皮手賤，看啊著該捲葉，就會一皮一皮摺佢摘下來，打開捲葉、捉起蟲仔，餵分屋簷鳥食。大紅花，領等佢兜，行轉屋下，行轉童年。

下崎个路脣左手析，有一戶人家，主人安到學老伯，看這莊肚人摺佢安个名仔就知，佢本旦係學老人，搬到客家莊來戴。佢當慶，對竹筴破做篾骨，對篾仔編做畚箕、毛蘭、菜籃還過籬簍、米籬，佢項項都通，樣樣就會。佢識看過學老伯又粗又貴个手巴掌，無想著佢編出來个東西恁靚恁幼秀！毋知幾多年前，佢走轉長山去賣鴨卵，子女也離開莊肚，屋當久無人戴咧，看著該娘婆花遮屋、丟籬橫壁，腦海肚浮起一遍荒涼个情景。

放學轉屋下个路項，你還記得幾多个人情、風景？恁想起來還有當多當多，也有當多當多个毋盼得。